

# Formaziun e perscrutaziun en servetsch da l'economia

Incumbensa parlamentara da deputà Andreas Felix (pbd Tschintg Vitgs)

■ (mc) En in'incumbensa parlamentara pretenda deputà Andreas Felix (pbd Tschintg Vitgs) da la regenza l'elaboraziun d'ina strategia da furmaziun e perscrutaziun orientada als basegns da l'economia. L'incumbensa è segnada da 61 deputadas e deputads. La fin da december 2015 ha la regenza communitgà ch'ella veglia elavurar sin fundament da la lescha federala per scolas autas e perscrutaziun ina atgna strategia chantunala per scolas autas e perscrutaziun. La basa per quest concept furmia in rapport d'experts che la regenza haja prendi per enconuschientscha. Quest rapport structureschia las activitads da las scolas autas e da la perscrutaziun dal Grischun tenor il princip da metter accents e da promover las fermezzas existentas. Sco elements da struttura ha la regenza proponì ils suandants champs da profil: turissem ed economia, resursas e privels da la natira, technologies invasivas, cultura e varietad, «Life Science» e «Comutional Science». Cun resalva ch'ils mieds finansials necessari sajan avant maun veglia la regenza realisar successivamain singulas recumandaziuns cuntegnidas en il rapport gia en il rom dal program guvernamental 2017–2020.

## Strategia è urgenta

Tenor l'avis da deputà *Andreas Felix*, il gestiunari da l'Uniun grischuna d'impressaris, tegn ina realisaziun successiva da las



**Deputà Andreas Felix (pbd Tschintg Vitgs) pretenda l'elavuraziun urgenta d'ina strategia da furmaziun che tegn quint dals basegns da l'economia.** FOTO O. ITEM

intenziuns strategicas colliada cun resalvas e senza coordinaziun cun ulteriurs stgalims da furmaziun betg sufficientamain quint da las sfidas economica actualas en il chantun Grischun. Differents parameters pretendian bleranz da priorisar l'urgenza d'ina vasta strategia da furmaziun e perscrutaziun.

En il rom da las scolas autas da la Svizra orientala veglia S. Gagl realisar ina direzziun autonoma cun ina participaziun marginala dals ulteriurs chantuns, de fac-

to senza il Grischun, constatescha Felix. Per la Scola auta per tecnica ed economia a Cuir (HTW) existia il privel da vegnir marginalisada. Quest ristg saja da cum-batter cun ina strategia da l'indipendenza. Cun l'areal disponibel da la resgia industrial a Domat disponia il Grischun er a lunga vista in potenzial considerabel per la diversificaziun e per ina basa pli largia da l'economia grischuna. Quella situaziun stoppia vegnir flancada cun mesiras da scolaziun e furmaziun.

Il svilup demographic da la populaziun fetschia quitads a las scolas professiunalas e medias, dentant er ad ulteriuras instituziuns da furmaziun cunzunt en las regiuns. Il combat da concorrenza per scolars e students e la mancanza da concepts saja ruinosa e pericliteschia la finala tuts e lur existenza, è Felix persuadi. Ina strategia da furmaziun stoppia cumpigliar tut ils secturs e stgalims. La disponibilitad da forzas da lavur qualifitgadas e la vischinanza d'instituziuns da furmaziun sajan facturs elementars per l'attractivitat dal lieu per las interpresas. En quest connex saja urgentamain necessari d'adattar la purschida als basegns da l'economia.

Andreas Felix e consegnants pretendan perquai che la regenza elavuria cun gronda prioritad ina vasta strategia da furmaziun e perscrutaziun che resguarda obligatoricamain l'economia e las instituziuns da furmaziun e perscrutaziun.